

四庫全書

集部

欽定四庫全書

集部  
弇州續稿卷二

詳校官編修<sub>臣</sub>潘庭筠

中書<sub>臣</sub>劉源溥覆勘

總校官進士<sub>臣</sub>楊懋珩

校對官檢討<sub>臣</sub>郭寅

謄錄監生<sub>臣</sub>許祖懷

欽定四庫全書

弇州續稿卷一

明 王世貞 撰

賦部

賦

靜姬賦

吳王時有靜姬者國之東海下邑某氏女也家  
世華膺父母愛之既饒令姿重以脩能讀書史

閑內則及笄而選得入宮掖備六尚之官階至  
嫔娥視中二千石頗亦貴矣而性好閒靜貞孤  
自樹不善為蠱又不善事其長循性而行見憎  
後進以讒賜退居永巷中乃為此賦以自解其  
辭曰

惟嫠精之下攝兮鍾靈淑於瑯琊媼心形之窈窕兮不  
飾步而阿儼媚然與先後而雜處兮挺瑤幹於蒹葭嘉  
命忽其賁臨兮遂托乘乎九霄叶迴天瞬之微矚兮備

九嬪之嫔娥又得尚君之司馭兮秉上介於陵園出不  
敢竊君之薄怒兮入不敢覬君之異恩居多避而少進  
兮藉禮義而自藩貴何希乎飾瑱兮佚胡羨乎乘軒  
三株之蔽月兮姮娥藉以擅宮衆望風而魄攝兮肩日  
脅以先容余獨安此拙薄兮足遭迴與心應衆既詠余  
之蛾眉兮遂飾余以強項乘驪龍之熟寐兮屏余返乎  
永巷白日匿光不迴照兮蒙氣抑邑而干霜琴既鼓夫  
裂地之衡颺兮又結橫天之妖虹紛余憫此同仇兮晨

徬徨而筵蓐憂後命之叵測兮竊有冀於將然更申申而詈余兮荃豈畏天日而甘此冥昏擲歡樂于俄頃兮就沈慙之大年余既不獲前衆以矯進兮又安敢後衆而虞退荃方極意於姬姜兮寧暇惜此管蒯追昔讐而自數兮覺面目之可示夜夷然其赴枕兮亦何恨於牀第忽鈞天之自西兮丙夜其猶未竟內忻忻其若偕兮吾王庶幾無疾病將玉體之不任兮宗社岌乎其焉凭彼彗亦何知兮唯快心於一誑晨盥漱而就巾幘兮倦

玉階之履綦紅女薄伎不足嬰兮聊發藻而陳書詩感  
鳴商之牝雞兮岐聖方重此關雎棄周鼎而寶康瓠兮  
恐外庭之類茲噫噫長門之若歲兮心悅君而不可得  
班寄情於白華兮終鬱鬱而難釋夫大椿亦道盡兮矧  
凜秋之飛藿余將夷長信于未央兮恣逍遙而無極

後靜姬賦

王既紉靜姬之七年采諫臣言追罰嬖幸之長  
以次就理下教大長秋故姬某婉孌而文以禮

自閑孤之不聰擿不中繫永巷省愆為日已久  
其賜湯沐襲冠服仍守故尚加秩一等使者臨  
致命靜姬固謝稱疾篤不任行使者去乃為賦  
以自廣其辭曰

歲際闕蓬之渚灘兮攝提貞于孟陬蕩明河使滌兩曜  
兮妖彗遁乎窮宵念娥媯之淑清兮王綸渙發于長秋  
妾久處此永巷兮實冥心乎九幽室向隅而迴照兮水  
覆地以再收感余髮之昔鬢兮今曲局而不可沐紅顏



包其弗明兮體骨立而膚剥脂澤黯其無光兮業已奮  
而中縮裳衣顛倒以思御兮尋沈吟而就襍燕啁啾其  
若賀兮雞喔喔以噉鳴隣女驚而九起兮慚阿監之不  
見微抑攻中之壯哀兮強脩顏而與行曰天聽忽卑兮  
帝命不于常舍冥冥之昏墊兮就昭昭之白日增成賜  
祓而召見兮輔屬體而若一蘭膏煜以燭夜兮椒風溫  
溫乎甲室芬芳溢于北宮兮餘輝傍暎乎西術飲五齊  
之捫乳兮啖以秬粳與飯餼二八代射而侍寢兮輕輦

出入于洞房目窮蓋珠之煜煜兮耳飽天樂之鏘鏘冠  
華鬢之七寶兮足下絲履五文章惟吾儕之蠅伏兮釜  
獨際而鵠伸胡戀戀此蹄涔兮若夜魚之愛鰥感祭者  
之見導兮寧獨脊而心非人歎君澤之難保兮往事耿  
其在顰甫調飢之相迫兮糗草甘而自腴胡啖余以八  
珍兮謫余而侈其喉得失若循環兮寶銷顏之冶鑪羌  
侘傺於一朝兮痛前轍之不須臾卧拖紳而冒絮兮不  
敢發乎君矇銜回枯之至仁兮雖槁死其奚能忘慚陋

質之么膺兮敢偃蹇而自托乎貞姜惟寢瘵之沾侶兮  
忍以薦乎君王感雨露之汪濊兮願均施乎萬卉彼怨  
女啐詠於深宮兮誠畏傳乎余耳念宗祧之鼎維兮又  
重虞乎玉體昔余皈誠於西母兮侍真餐焉而啓齒重  
曰生理有涯兮欲無涯元真易去兮不易歸有情無情  
兮我媚我芳恬澹寂寞兮千齡為期

白鸚鵡賦

鸚鵡純綠色以其喙紅黑為雄雌見鐵圍山叢

談而白者紅者五色者最不易得北戶錄桂海  
志皆稱白者稍大於它鸚鵡冠有五羽若護華  
作輕黃色怒則盡張尾截於鵠外粉內蜜余從  
友人徐子與所見之果爾而靈慧秀俊依人可  
憐子與以余之喜之也舉籠以贈而徵一賦焉  
其視正平不能彷彿視延年摩詰或差有致耳  
猗西域之慧羽稟金方之淑潤頻迦授以仙音孟虧錫  
其美脣倘瑤池之托質何青鳥之傳信冠擬護而三秀

尾如鵠而偏俊若乃孕別雄雌喙分丹黑黑則片葉破  
霜丹則微苞坼白豈辨口之象人實靈心之天錫忽乎  
穿林閃銀梭之秀機舒而飲泉儼螺觴之承瀝於是虞  
人憇憇以進羅射師屏營而却弩雖靡逃乎一目幸毋  
損其片羽強彷徨而就食中掩抑而思土塊焉獨處悄  
然私語彼越裳之遙使何異德而並依此隴首之下傳  
復質是而文非出入珠愚夷猶紫微感異夢於司空受  
真經乎貴妃爾其性含雅馴度絕驚怒皓魄增輝飛霞

奪素壁人出則一市盡傾玉奴入則六宮爭妬何郎傳  
粉以清言杞婦被縞而悲訴偶失身於罝網遂長辭於  
林樾足何辜而見維翮奚妨而遭鍛嗟半菽之示恩均  
轍淦以苟活顧壺冰以憐影臨綺颺而捫舌乃有謝豹  
勸歸倉庚和歌聞音似友辨字則叱彼栖鵬之濯濯或  
舞鶴之傚傚儼長狄之來魯郊非族類其奈何是以絕  
念戎荒甘心謝庭藉玉樹以長棲顧瑶草而怡情啜三  
危之澄漿飯九光之秀莖願得臣弇州之大鳥相與誦

聖瑞於千齡

紅鸚鵡賦

余賦白鸚鵡之再歲而家仲氏以覲歸自江右  
則攜一紅鸚鵡云左伯張春宇氏所贈者色殷  
翠可愛亡它雜羽雙趾亦如之唯喙黃耳雖語  
不能四五而皆明了間作歌音宛轉流利若中  
節奏仲氏甚珍之再攜之江右則為隣院焚尸  
衣烟觸死矣余感其薄命而天聊為詠言昔謝

莊賦成素淑掩卷今其存者雖不十五皆摘其尤而事鮮旁證味同嚼蠟語云才難不其然乎

余之此賦雖不足鼓吹正平庶為此鳥傳神耳  
粵古西王母命彼青鳥使於祝融祝融賓之便嬖甚口  
靡所不通爰祈孟虧邁報聘者百羽道盡而得鸚鵡錫  
之緋服毋與綠伍其緋伊何則猩猩氏之所潤色也辭  
命伊何又猩猩氏之所訓譯也惟是瑤臺介紹皆曰殷  
鮮朱鳥以為上客王母異之栖以珊瑚之樹而薦以火



齊之席韎韜堆盤櫻桃的歷琥珀映觴瓊漿流液仙姬  
羣醉兩輔差敵瞥焉長辭東越流沙虞人睥目畢弋交  
加惜銜命之未達忽中構乎網羅感炎荒之故主誓矢  
死而靡他主人愛之長離斯亞白玉為籠黃金橫架飼  
以丹實酌以清泠豈無寸心與貌偕頽將結咽而無言  
虞不鳴之見烹于是誦彌陀祝天帝稱千秋與萬歲燦  
齒賈姬破顏褒如聲何貴乎裂帛貌胡擇乎射雉若乃  
展清歌流妙音如中宮商因風浮沈咬咬裊裊絛蠻冶

淫感韓娥之停耳將師延之寫心或翩然其翻袂呈巧  
舞于君之掌忽窈窕以穿林又徘徊而侵幌爛爛兮落  
霞剪秋颺湛湛兮芙蓉受朝暉凝睇則朱紱斯皇過隙  
則景天夕飛心搖颺而欲逝尋眷戀以長依感新恩之  
瑰渥不羞呈乎百伎苟賤質其未縻唯一人之斯媚天  
豈奪爾胭脂之山忽粉消而紅瘁將妖夢之是踐處深  
篝而遭驚悲日南之永隔雖少君其弗可致嗟乎佳人  
含軫于薄命才士流惜於短年馬嵬之血清土江夏之

魄施烟彼固授汝以般若之經而贈汝以春容之篇者也尚先汝而璧碎亦奚貴乎瓦全辭曰天命玄鳥降生商兮帝官白雀脣上卿兮汝才百倍等螭螭兮魂乎歸來毋盡傷兮為汝傳神永不亡兮彼詞寥寥胡謝莊兮

### 紅倒掛鳥賦

丁丑之春余栖弇園有自郡來者言客攜紅鸚鵡求售其直為六金余殺其五鏹得之至則非鸚鵡也其體量小十之六首尾紅色如猩血而

兩翅各一二莖如翡翠腹毛隱隱作鶯黃背差  
類鸚鵡而小色亦黃其音婉麗輕細極馴擾出  
入人懷袖間竟不能辨為何鳥而時時掛一足  
於架倒懸移晷尺不動則意其為倒掛鳥也居  
一歲死葬之先月亭後土岡叢條下考蘇子瞻  
詞有所謂倒掛綠毛么鳳劉績霏雪錄謂即李  
贇皇所賦扇中五色桐花鳳也成都大岷江磯  
多植紫桐每至春暮來集桐花以飲朝露花落

散去不知所嚮又李之儀有詞云朱唇玉羽下  
蓬萊佳時近早梅自注云此鳥以十二月來一  
名收香倒掛又名探花使性極馴好集美人釵  
上宴客終席不去人愛之無所害唐僧隱詩亦  
云美人買得偏憐惜移向金釵重幾銖楊用脩  
復緣劉續錄以倒掛為桐花鳳然其至也李之  
儀以為十二月而德裕乃以為暮春子瞻之詞  
綠而之儀之詞則白差小不同復考范成大桂

海虞衡志則謂彼地有五色倒掛鳥極馴狎可愛而一種奇者畫則能聚諸香羽間夜分倒懸于架徐出之費氏星槎勝覽直云爪哇國有五色收香倒掛鳥則彼地所出皆善收香者也今不聞成都有此鳥疑德裕所謂桐花五色靈禽者別為一物而賦辭則云發長袂之清香掩短歌之孤嘯又似收香倒掛將所謂發香掩嘯為賦扇也耶余所得此鳥稍大於燕或不類而峭

潔婉麗時時倒掛又有不可曉者賦而紀之以  
俟博聞者攷焉

熒惑之精瑤光之星鍾自南服命之帝庭曰爾為赤而  
不為烏又弗肯與燕雀徒既俊而翔洵美且都昔張翁  
之纂劉佳白羽之知歸既脣之以上卿又申錫以朱緋  
倉鷗帝服爾其相之睨睨徽音厥亦差池調節柔骨巧  
態多姿其穿葉也若頰鱗之的的其棲枝也若丹荔之  
離離遠則熠燿之曳簪邇則金梭之透機若乃蜂蠟點

脣鵲黃裏肚穿和入袞斂羽就輔如戀如暉或歌或訴  
又如嬌女需責乳哺豈青雀之入懷寧飢鷹之暫依忽  
倦栖而思奮翹一足以累累夫孰不困于倒懸汝乃斂  
息而樂之抑千歲之伏翼腦初重而下垂將掛藤之渴  
猿俯以窺夫深池爾其丙帳聚芬甲夜吐篆霏霧時撲  
縷烟不斷晝既爛兮目成宵復通乎鼻觀得非從天女  
游而啄香積飯者耶惟德惟色皆汝之羸而斯伎之未  
能彼辟寒之鳥同汝並棲乎妓膺彼以輕而見憐此毋



以重而或憎余皆不汝責而恃汝以老將畢吾耳目之  
好胡溘焉而就冥使房櫳之如掃亂曰如意未展珊瑚  
碎兮玫瑰隕魄沈波際兮嬌音在梁有餘媚兮葬汝茲  
麓毋為厲兮吳王小女挾汝侍兮

馴鵠賦

余有馴鵠數十頭頗極美麗飛雛循性飲啄得  
所聊為賦之

惟中國之珍禽有茲羽之殊質貌皦皦而自分性溫然

其如一秋則籬籊並麗於潯陽春則木藥均華于洛室  
指未易屈譜不能悉爾乃玉甯朱眸危冠卑趾或冰質  
而彩其雙翅或雪毛而黔其首尾或若漢繡之就機或  
若商彝之出水山雞莫調家雉無文爾獨馴狎雲錦成  
羣飢而兒女之昵昵飽矣童稚之欣欣方捐心以委質  
忽聳身而入雲舒徐兮停霞之碎剪燥疾兮奔星之疊  
發忽天樂之鎗鏐知傳鈴于尻末始順風而揚聲奈迴  
颺之錯節若夫昂首聳肩周旋中規婉態柔音逐雄媚

唯無別差慚乎匹鴛鴦淫少愧乎關雎然而知足知止  
毋乃天機當抱卵之綿綿若返聽乎玄府憐弱雛之艱  
食更嘔哺而不辭苦感主人之微祿日徬徨兮未忍去  
嗟德曜之肥醜恐終羅乎鼎俎彼夫好水之敗以為爾  
罪端陽之射與器俱碎霜風冽野鷹隼方厲托慈蔭于  
佛日指招提而趨避暑若狂夫衽鐵思婦流黃遼陽一  
信為致君傍辭曰洛中黃耳為日長上林雁素竟茫茫  
不辭天衢遠銜恩酬稻粱

哀辭

魏考功懋權哀辭

魏郡魏允中字懋權弱冠為博士弟子者十年試婁第一最後試於京兆復第一遂赫然有海內聲明年屈於禮部又三年復得第三人暨廷對為丙科第一人拜太常博士久之特遷吏部司勳主事尋移考功中寒疾醫者藥之誤以死春秋僅四十二而已懋權之父太公用明經仕為

關

倅垂九載移疾歸猶弗具橐有三子

皆以文行取甲第懋權其仲也長身疎眉目偉姿槩為  
人尤簡直朗鼎齒在卑穉身猶逢掖而志意雄千古材  
氣冠一世余故起家飭魏之兵事得懋權於諸生中而  
異之會行屯邢之黃寺堡挾以從懋權所試治舉子義  
雖步驟不中程然識其必千里也已搜其索得詩數章  
遂以古文辭進余覽之雖未就刪琢然識其必清廟器  
也故為韻語以贈之至末云還將代興意對酒頌如澠  
其屬意懋權者非輕淺也既別懋權於舉子義益精古

文辭益成長歲丙子余與王大參陽德飲於其使院使  
急足徼順天錄而語之啓錄而魏某第一者鼓於門不  
第一不鼓也抵暮鼓發則懋權果第一相與譁叫絕倒  
久之記此事殆如昨日耳余性不喜當人師有贄幣而  
稱門弟子者掩耳避之若浼至懋權之授書而以門弟  
子禮來雖一再辭然不至作掩耳避者余非謂足當懋  
權師以余之知懋權深也嗚呼懋權今已矣海內之操  
七寸管而治舉子義者將歎且詫曰吾曹失一指南矣

其稍慕為古文辭者將曰失一名士矣其慷慨持論依  
傳風節者將曰失一赤幟矣廊廟之上念及藥籠者將  
曰失一珍餌矣而余猶以為未盡余所惜者令懋權不  
死必能為縣官作汲長孺韓稚圭其又不死而進之雖  
抗顏而談理性若王仲淹張子厚挹汾渭之流而俎豆  
洙泗之傍亦無艱者今復何望也懋權為博士時數以  
不依阿師長持議謬謬其語入執政耳執政忮欲脩郤  
於懋權未及發而殞無何懋權之兄侍御史懋忠指摘

後執政語絕不可聞後之執政寬雖小示左而旋收之  
更拔懋權要地夫以執政之欲脩郤於庶僚反掌耳其  
寬者既如此而忮者又如彼天之於懋權當不為無意  
也博士於格為諫官以懋權之直而為諫官事必爭爭  
必得危小者官大者身今去懋權之危而置之格之上  
以伸之固人也亦未必非天意也懋權之生四十二年  
矣天固無所不厚一旦而奪之者何也懋權忠於君孝  
於親篤於兄弟信於友非有所致奪也夫以余之無似



陸沈於朝省恣睢於林野者踰三紀而其猖狂翰墨亦如之晚節傲天子之命以老而卒無所見乃不死而使懋權死者何也懋權既厄於年不獲竟二立而中復薄古文辭以為雕虫末技耳不足以煩吾思譬之果然之腹必鼎簋而厭壺簞竟從貿貿者以死豈盡不幸哉余既為懋權惜為懋權之父兄惜為國家惜為世之操觚者惜而悲其志之大而懼其竟泯泯也草哀辭一通手書寄其兄使焚之懋權之輜左而別留藁於篋以示後

世母遂泯泯懋權其文曰

嗚呼夫何靈禽三產於丹穴兮長離獨翹然於中央冠  
南金之彪炳兮五彩陸離其文章望阿閣而矯吭兮翮  
音協而中宮商天老頽伏而告祥兮后夔擊石而揚浩  
倡蔭以嶧陽之翠蓋兮薦以嶰谷之芳穗嗟嚶容與於  
玄圃兮萬目睽睽而拭眚忽歲蕤其吉光兮曾不得終  
賁乎昭代乃召巫陽而訊之兮將招魂乎四裔陽曰帝  
意惆恍莫可控揣忽予忽奪焉覩所在陽愧失職自竄

大荒發櫝布占當塗之慶後四千年文明以昌猗畢氏  
之樹滋兮感土王而來聚白眉皦其獨良兮長頭偉而  
最怒瑤姿頰以晚顏兮饒百能脩且嫖挾象龍之文葩  
兮指康衢而馳驟焚都梁於木末兮順飈揚乎天路疇不  
仰荃之芬菲兮逐臭之夫乃掩鼻而却步夕賜沐於椒  
寢兮晨播熉乎中涓衆方狃狃而詠荃之蛾眉兮爭飾  
輔而脇肩袖攘挽而思秘兮尹徊徨而聲自吞若朝霞  
特出於晦靄兮一身當乎三千余豈夸荃之逞意兮實

宗祧乎是賴迺大命之弗延兮先秋卉而凋瘵氣猶暉  
暉而神王兮將毋咎此質骸肉謝骨而就腐兮嗟衆口  
之甫膾少妻夜號於逆旅兮儼寡鵠之啼風老父晨咽  
而倚閭兮念舐犢之何從季子目斷於青門兮長君魂  
搖於白下悼人琴之俱絕兮哀塤篪之和寡指蒼天而  
為正兮天胡至此極也豈造物者之好戲兮何喜怒併  
於頃刻也彼迷陽偃蹇而叢生兮蘭玉茁而見鉏狐狼  
交跡於五父兮祥麟訖而遽屠羌淫泆之積厲兮人亦

乘之以為虐生與時而終左兮亦焉知夫死之不樂重  
曰然歟否耶咄咄喑喑太和蒸兮斯汝造明良際兮爰  
汝好汝得世兮聊以逞世得汝兮以為寶鵬何鍛兮扶  
搖驪何蹶兮中衡得汝兮無雙失汝兮不再微辭宛兮  
若新曼容杳兮焉在覩倫常之盛際兮汝安能忍焉而  
遽背鞭鯨馭虹太怳惚兮孰與京洛之重載佺期矯矯  
稱先進兮何似詖蕩而友吾曹淮南守廁不得代兮曷  
若地肺之消搖笑巫陽失職而久適兮魂媮佚而不可

追登徒忽忽有從往兮卒不覩夫靈均之歸亂曰人生  
百年等暮旦兮所貴不朽在末筭兮追琢荆璵為圭瓚  
兮未器而毀能無數兮奉此昭昭歸汗漫兮化為列星  
麗天漢兮

商城令孝廉翼亭沈君哀辭

前進士商城令孝廉沈君以葬其封工部鐵山公哀瘁  
之極臨窆立逝竊悲其志燉其節而惜其未下壽也撰  
哀辭一通以侑漿脯君其庶幾酬余哉

嗚呼在壬午之秋中兮封公先而棄公夕發訃而號慟  
兮晨策蹇以南東衿紳悵焉其莫可攀兮稚老狂追而  
巷欲空相與陬商邑之息壤兮尸而祝之循吏之宮惟  
余掩跡於婁渚兮歲黯黯其將窮偕季子以見訪兮悴  
然墨乎其容謂微言之可托兮悲冥駕之莫從遂銜戚  
以卜藏兮送艦傾乎吳之渚素旒夭矯而前驅兮嬰紼  
彌漫於川塢彼原劇之為俠兮曾何足以比數念臨穴  
之慘慄兮誓以身辱乎黃土嗟嗟孝廉真死孝兮夫孰

鑒此茶苦生人變化在俄頃兮使余臆結而不得吐追  
嶠嶺之一夕兮竟倏歟而成今古惟愚子之乏訓兮幸  
得尚公之令女謝姻婭之舊好兮恂恂遜余以前哲夫  
既政成於商邑兮謂卓魯其非所屑撫朱絃而三歎兮  
將以寄榮名於白雪忽超然而遐覽兮厭濁世之羈紲  
不悟余之非罔象兮玄珠炯炯其可擷豈司命之見妬  
兮或帝真之所切逐霞旌之惝恍兮駕雲車以飄瞥昔  
余束髮而登朝兮王父辱收之以交誼封公侯乎其玉



立兮遂復申乎世契愧班管之如椽兮咸不朽之余寄  
既博觀於昭代兮曷有如公之善繼冠切雲之崔嵬兮  
襍衆芳以爲佩甫弱冠而歌鹿兮公車躑躅於中歲兮  
薇垣以百里兮美錦成乎彊仕陋夫太史之傳滑稽兮  
曾不覩西門之威惠吾獨歎昌黎之志馬氏兮感行藏  
乎三世後死者之與斯文兮能無跼蹐乎前逝亂曰於  
忽乎嗟哉千載一日兮志志不可究質兮何以托棕枹  
漿蘭蒸兮回風靈旗卒莫可憑兮豈不爾思隔幽明兮

庶幾來歆鑒我誠兮

辭

植桃辭

時植桃於司刑之署  
入夏未榮故有感也

署何托兮幽狴桃胡植兮夕庭忽春徂兮朱夏僕夫痛  
兮告予以未榮憔悴兮若中霜又若長遠兮初折上枝  
兮若髡下枝兮若緹迎風兮欲有言風過兮咽復吞中  
夜兮長太息不言兮請對以臆此何辜兮牆陰彼何幸  
兮上林流蘇障兮的歷七寶楯兮沈深不然歸兮武陵

徑千秋兮疇伐山窈窕兮天地水潺湲兮日月惜爾兮  
匪處蹇覲質兮薄土大鈞兮何忍亦奚恫兮老圃

翫魚辭

中庭兮尋展髣髴兮為池脩鱗兮下上朱華兮參差綠  
蘋波兮乍驚盼繁英風兮照歷亂下上兮星列參差兮  
霞綯容何為兮頽且都意何為兮圍未舒聊鼓沫兮就  
人恍若怯兮潛於虛予懷兮未敢言相對兮各茫然滄  
波兮萬項目斷兮誰傳期振袂兮清泠何升斗之足憐

二章舊軼稿也其辭  
雅矣惜其寄而存之

徽士有立而其二親久背者友人沈明臣為署曰

白雲遺思而以三章系之王子乃和焉

南山巖從兮雲吐其封北山庵靄兮雲栖其晦雲之白  
兮逾舜華兩輔接兮陽陰以和陽陰和兮蒸霖雨潤汝  
膏汝兮俾無苦雲之來兮恍有倪雲條去兮返無期雲  
有族兮承南離輪囷兮五色歲蕤爵以卿兮非汝好飾  
以商兮汝告予以弗耀重曰昔賢瞻兮親在其下今我

瞻兮親於何所安得從龍兮薄太清引吭哀鳴兮為我  
少停

弇州續稿卷一

欽定四庫全書

弇州續稿卷二

明 王世貞 撰

詩部

擬古樂府

白雲謠

白雲西來瀰漫四垂雖有赤麓疇能不迷將子暫留有  
桃如飴

穆天子謠

子洽東夏偕化人居豈無羣后唯子是儀執袪而騰不以脛馳

易水歌

荆卿將入秦客送之易水荆卿歌焉而客和之  
易水立兮虹繚天壯士一出兮秦為燕

垓下歌

羣雄伏兮嬰授首縱孤豚兮嚙人肘虞兮離兮奔若遺



天亡我兮將告誰

大風歌

高帝幸沛宴父老歌大風中大夫賈誼而和焉  
大風發兮揚天威一劍游兮萬乘歸願得五臣兮贊無  
為

秋風辭

武帝渡汾河中流擊楫而歌秋風文園令相如  
跪而和焉

秋風謾謾兮霜未飛草木忍彫兮待恩暉晉有壁兮汾  
有珠君心懌兮自敷腴鉏金鉏兮雷大鼓神魚躍兮黃  
鵠舞志詆蕩兮媒慨慷來日短兮去日長望岩堯兮聳  
雙龍恭已無為兮垂舜裳後天地兮凋三光

李夫人歌

人耶仙耶宛然而來者疇為汝之權耶  
仙耶人耶翩然而去者疇為汝之身耶

平城歌

漢使來胡馬死漢使歸死馬起生何致致漢天子

其二

曲逆腹如脰脰不能出一奇彼有閼氏此有戚姬

其三

開一角縱漢兵漢天子有神靈

其四

漢天子何神靈韓彭死冒頓生

其五

閼氏妬妬漢女單于樂樂翁主金珠紈縠壓駝馬

烏孫公主歌

妾人自慚兮諸侯女謬托嘉名兮漢翁主寵我餌我兮  
作遠婚匈奴賤種兮號烏孫昆彌老兮非我偶少王壯  
兮實余後念欲一死兮為國憂失身苟活兮貽國羞丞  
相何人兮爵通侯

蹕林歌

六羸馬白羽竒嫖姚物故天助我單于自將會蹕林左

賢一矢貫兩禽

敕勒歌

銀服匿紫氍毹寧胡闕氏奏漢樂北風攝羊一萬角十道壯馬不得索

嬌女詩

嬌女好姿首不為他人媚阿母手簪花花擲棄之地作女任汝驕作婦恐不易

三洲歌

阿母見錢喜女今見錢悲金鑄估客身不得好心期

其二

萬斛我珂舟人道是珍賄一頭載紅粧一頭載綠螳

其三

舡過第三洲日落門前樹定有可憎人儂今不肯住

襄陽蹋銅蹄

襄陽老龍隄巖石鐵作泥駿馬驕鑿落真是蹋銅蹄

其二

買得樊城酒來醉襄陽伎人道江波險儂道是平地

其三

宜城七十里朱樓與雲齊無地著酒館眼飽肚中饑

其四

醉倒習家池扶郎郎不歸道儂工下淚去看羊公碑

宿阿曲

天門三十六地戶七十二門門與戶一一一天帝

石城曲

石城諸郎子結束種種新眼角多留媚是儂昨夜人

其二

廣陵細腰女搦搦裁一束不敢望同生一宵抱亦足

莫愁樂

家家迎莫愁人人說莫愁莫愁歌一字恰恰印心頭

其二

十萬作纏頭莫愁不肯留銀缸黯欲盡翻為莫愁愁

休洗紅



休洗紅洗多漸成碧裁作儂衣不中飾紅隨逝水香不  
歸何似當初但為白

千里馬

千里馬胡不疲五帝漸以驟三王不免馳焉能飽食安  
步歌皇義上乘此馬將何之

軹深井里門行有叙

余讀太史公所著刺客傳意獨取聶政謂養母  
而不以身許人孝也母死而後捐七尺以殉所

知烈也弁髦百鎰之金而卻之廉也取萬乘之君若相於夾鉞之中若承蜩勇也死而皮面決眼使不可識以全其姊弟也其姊蓋深知之故捐脰以伸其名於後世雖然政非特欲全姊也意實欲全嚴仲子於何知之其言曰多人不能無生得失生得失則語泄是韓舉國而與仲子為讐之言也所以皮面決眼使不可識者此也嗟乎使豫讓之捷若政必能快意於襄子以下

報智伯荆卿之謀果若政必能輕身以刺祖龍  
而匿燕丹之遣惜哉前乎此而未有政也後乎  
此而政不作也據史刺俠累因併韓哀侯傳誤  
韓國嬖大夫軹深里中客車馬委巷過貴賤不相敵長  
跪觴母前別致金百鎰為母隱狗屠未敢輕七尺惟有  
徑寸丹耿耿挂其臆母死服已除慨焉欲有伸大夫不  
共天俠累相且親偻行至韓國仗劔入其闔長戟五百  
隊戢戢若魚鱗傍睨陛楯間眇若無一人挺刃不三揮

立斂其君臣所當悉靡碎憤血射青旻皮面屠出腸頃  
刻捐其身法當購主名千金尸諸市親友皆避匿乃獨  
驚其姊撫尸獨呼天是軹深井里聶姓以政名心借嚴  
仲子捐軀為其友毀形為其姊弟昔從母生姊今從弟  
死仲子願已酬株累亦可矣安能顧區區千秋掩賢弟  
我欲竟此曲一曲酒百卮寧如豫與荆身歿有餘悲

信陵行

太史公傳四公子吾獨取信陵君無忌焉夫孟

嘗平原春申皆以國重者也信陵能重國者也  
信陵在魏不亡亡信陵而魏繼之悲夫三公子  
非真能下士也所下亦非真士也真下士者一  
信陵君而已其聲施後世至高帝而猶為之置  
守冢有以也夫

侯嬴夷門監朱亥猪狗屠薛公賣漿者毛公一博徒公  
子枉見之腰膂屈若無上客氣未平下客眼為枯疇擊  
晉將軍疇竊宮中符疇能動公子趣駕返魏都一戰王

齧走再戰蒙騫逋邯鄲復稱趙大梁不為墟五國所賓  
從響應復景趙秦間一何親令弟一何疎秦王一何狡  
魏王一何愚少來不縱酒亦不戀名姝稱病不復朝謝  
客日都盧寧為汴郊鬼勿作咸陽俘英風感異代天子  
酌其丘可憐安釐王不得夢一孟客從咸陽來幾作諸  
侯奴亦言驪山足久已窟妖狐

魯朱家行

太史公游俠傳其在戰國者皆別見之所著魯

朱家以下不數人而獨朱家最賢其巧喻奇舉  
善藏不伐大指出魯仲連而卒能自保牖下田  
仲劇孟稍祖述之郭解翁伯不盡得其意而加  
以陰賊行之平世宜其及也

朱家昔在漢與高帝同世為俠不沾沾中心實自喜藏  
活豪賢以百數餘人不勝紀斥買十鉗奴中有季將軍  
畫策謁滕公上為赦其罪得復拜郎中將軍既尊貴若  
遺忘故恩朱家終身不相見亦不復自言將軍與弟心

其乃師其意一勇一諾聞諾者至死長負愧俠兒有田  
孫有劇任俠不已郭翁伯嗟嗟膂斷族亦赤

鵠夷子行

太史公傳貨殖以十數余獨取陶朱公陶朱公  
者鵠夷子皮也夫其佐句踐滅夫差為田常殲  
子我所至必成功功成而弃之若遺出策致賄  
數十年而三散千金尚能聽息於子孫以致鉅  
萬蓋先幾若著蔡出沒變化若鬼神矣度其後



先所更歷當且餘百歲或云七雄滅公變名姓  
賣藥市中蓋仙去不死也

計然有七策少伯五用之芻粟如丘山坐使會稽肥滅  
吳既彊越奔之忽若遺扁舟適齊邦自稱鴟夷子皮為  
田僂子我陰使齊社移忽復謝所宗以其重寶歸陶適  
天下中衆賄所化居黃金直千萬三致三復揮少子誅  
了不悲老氏張翕吾所師神龍變化那可羈安用區區  
相印為

雁門太守行

太史公傳酷吏吾獨取郅都都公廉忠信而不  
得免坐臨江王寃死耳夫臨江王故皇太子也  
都以景帝多猜疑其臣即予紙筆上書而上切  
責以因安得上書誰與紙筆者且及我在而貳  
其心為異日地故禁弗予而王得之魏其侯乃  
自殺矣都亦不得為無罪第不可遽坐之酷耳  
至其面止上搏熊而救賈姬揖丞相條侯豈齷

齟齬成義縱伍都為雁門太守匈奴畏之不敢  
近邊者終其身至為偶人象都縱騎馳射莫能  
中其見憚如此嗟嗟豈易言哉

太守未行屯與敵共雁門雁門得太守始復為漢有太  
守來匈奴走碧眼番兒射雕手目瞋舌噤畏木偶臨江  
死太守生長信宮中氣未平太守死單于喜未央宮中  
上拊髀曷不早赦臨江王孝子忠臣兩無傷

東方曼倩行

太史公傳滑稽吾獨取東方生焉所欲稱者具  
夏侯孝若贊矣隱括其事歌之

孝武帝時有東方生長九尺餘月請一囊粟不能並侏  
儒用奇釣上聞待詔始離公車射覆多巧中往往解上  
頤舌折郭舍人戟止館陶兒拔劍割伏肉殿上或小遺  
恠哉辨秦獄騶牙表降夷歌鄭必終雅為諛不廢直偶  
爾乞大官無官意亦得上賜頗不貲梁肉金錢帛悉送  
宛若家相與行交接海鷗一世主兒戲諸王公首陽呼

為拙柱下始云工寧學公孫丞相脫粟不令春廚車載  
渭橋巫蠱滿東宮揮手謝世人竦身白雲中

潁水濁

潁水濁灌氏族灌氏族魏其僂結交莫結俠結俠身似  
葉使氣莫使酒酒中三尺鐵捐身為名名不美當時悔  
作有心鬼不教田蚡礫東市

莫跋扈

莫跋扈付丁旡莫侮張付桓康半面哭半面啼死與生

卷二  
在一時壞長城猶自哿蝕明月我滅我

古押衙

蛙龜在溝中求喫天鵝肉仙客小鰥夫思從宮嬪宿明珠故自珍龍額有逆鱗富平古押衙一片有心人一片心幾腔血殺人滅口身併滅淮西有李朝有裴七尺不售君王奇坐忍萬姓皆攢眉

施殿司

施殿司不了事可憐一片心化作千載淚竊國誤國凡

幾輩夜博罷鼯滿堂醉千人顰眉萬人指不見頭顱化  
為水我疑古來少劍客不然劍客非男子

賈團練

循州竄漳州竄懊惱吳團練不見賈團練蕪湖覆臨安  
覆生憎陳都督死為賈都督當時失刑賴虎臣虎臣小  
臣何足論惜哉宋季終無人

頂生王

頂生王福德圓三十二相種種全生時七寶俱見前遂

馮金輪王四天一天一王二萬年帝釋之宮須彌顛天  
厨天樂天無邊願分半席長周旋歡娛不足貪念至欲  
逐桓因奪其位咄咄未絕條墮地七寶俄然盡捐弃鐵  
圍城中火方熾燒君四大能不悔

阿脩羅

阿脩羅報生大海中金銀為闕琉璃宮五欲約畧人間  
同壽億萬歲永無終猶恨不及帝釋天貪嗔在心吻吐  
烟聳身直上須彌顛兩手欲掩日月圓却敵城頭戟如



霜四天奔波悉勤王法華寶經置中央脩羅萬衆條敗  
亡藕絲中細不得藏事已非空倨罵縛汝不殺特汝赦  
何顏復立須彌下

琉璃王

琉璃王母為波斯匿王女宮中小婢稱翁主不產麒麟  
產狼虎兒時漫陟獅子座釋種小語摩訶禍琉璃王嗔  
心一起火燎岡十萬劒戟橫清霜倒曳宰堵躡佛場可  
憐諸釋種不蓄四兵抱頭死血作阿耨池頭水云胡破

戒呼婢子琉璃王水中有火如汝嗔火車擁入阿鼻門  
嗟嗟能仁未為仁死不能救稱宿因

無憂王

無憂王昔作童子戲搏沙奉世尊遂登鐵輪位以此夙  
因皮肉麗宮中為歡不成娛三千嬌女併就屠拔將蔑  
戾車生主阿鼻獄鑊湯與火牀碓剉諸業毒但入不得  
出入者已非一不獨禍平人行復賺王入烹燒惡獄主  
剉平生阿鼻昔作無厭殺今作無厭施發取八萬四千

佛舍利立造八萬四千窣堵波一夜役鬼神為我分置  
娑婆九十六千億黃金不如當時一掬沙金器銀器及  
銅瓦不如最後半訶摩勒果摩登伽鶩崛摩一念迴向  
成阿羅福德可似人王多倘不蚤悔將奈何

樂府變十章

叙曰不佞於嘉靖末蓋多浮沈閭里云而以嘗備  
皂衣西省故時時聞北來事意不能自己偶有所  
紀被之古聲以附於寺人漆婦之末其前集取亡

害者半留之幾欲削去其餘既復自念三百篇不  
廢風風人之語其悼亂惡讒不啻若自口出乃猶  
以依隱善托稱之詩亡然後春秋作至直借賞罰  
之柄而不聞有議其後者秦興而始禁偶語焚載  
籍然不久而漢竟洗之以國家寬大顯信其必亡  
慮於它可推已余老矣夫又安能刺刺頰舌之恤  
乃復收而錄諸篋笥不敢希太師之采庶幾以備  
異時信史一二云爾

楚愍王

楚愍王坐武昌金瓶酒寒夜未央中絃調移角奮揚鐵  
椎交飛血從橫可憐玉匣黃金牀不得全顱置中央太  
子距躍不下堂美人如花列兩行含辛飲淚娛新王焉  
用擗棘茨垣牆御史來鼓彭彭黃紙當頭檻車迎長安  
大人食臯羹食臯羹語臯子而臯之父亦如此

黃河來

黃河西來崑崙小復前滙玉關自是白羊樓煩漢將所

築城犬牙其間

解一

敵闌入之不休索駝駒駝牛控絃

穹廬四周自我失新秦州與敵雜治共繇

解二

出彊者何

大夫大夫魯君憂虞人吏買馬具車詰朝慷慨就途上

請誓劔璽書

解三

咄嗟大夫不覩長安之城武安魏其日

夜引繩斷斷千金偏行奚為金吾白發之赫哉天威

解四

咄嗟大夫不見兵出玉關乃見藁街之西不懸郅支乃

懸大夫萬水東流魚西上鈎誰獨為敵人快私讐咄嗟

大夫乃為相君快其讐

解五

咄嗟大夫氣盡不復謹謠離

離山下苗托蔭山上桃風吹桃根墮苗行代桃焦可憐  
生無常生死借人驕

六解

### 商中丞

惜女商中丞胡不冠而惠文逍遙坐高堂誰令六師女  
張皇高天下有白日不照將軍之門惜女中丞白日又  
不照未央肘腋之禍私所詳欲言未言以彷徨惜女中  
丞曷不為良臣勢迫難為良念欲為忠臣忠臣罹禍殃  
甲士三十萬東西若風雲惜女中丞自有君子六千人

不願隸大將軍願隸主上察不臣喏女中丞雷霆蔽天  
來一何殷殷不收脫女惠文之冠三木而囊頭朝備席  
上僚暮列庭下囚喏女中丞養犬吠發宵人之姦後宮  
乃得脯脂養犬以饗餐喏女中丞編槿衡禦闌入之暴  
臣隲者乃得剪撤編槿以為薪詔使馳入壁欲歸定遠  
符前庭族將軍後庭出赦書肉如嶠賜大舖健兒擦血  
馬散珠還我冠冠中丞爭呼四望追鋒車喏女中丞覆  
盆之光獨不開飲絲茹綸向泉臺日出之日胡為哉



石頭變

百鷲能擊鷹百螳能嚙虫石頭衆兒郎晨起各淘淘勁  
足扶老拳立蹴肥司農可憐肥司農七尺氣如虹小如  
一孤雛引脰懸高空擣擗大司馬蒲伏中山公鵠立羣  
公卿鼠竄血肉中九日不解甲十日不開營金帛捆載  
來坊市無人行黃紙詔書下朝鼓何瞳瞳盡赦諸軍罪  
追奪司農名司農孤櫬歸兒女泣吞聲諸軍懽呼散大  
酒肥羊羹殺人不抵償不追首事蹤司馬不削官中山

不削封揚揚衆公卿還復休其官弱者餓欲死强者醉  
詈天時無賀六渾焉知散財結少年

暴公子

漢武帝時有一暴公子自稱直指使者來治齊魯黃紙  
為前驅從史持繡斧使者如雷霆雷霆當頭下使者未  
行來墨吏紛紛解綬去田里手即平淮書口即冠軍語  
使者既行來墨吏不肯去去者乃老博士扶服道傍戚  
戚仰天大泣涕有何鄉老公積鏹萬千念非睚眦豪不

敢屬縣官告密一見聞束縛妻子若牛羊東家盜遺骸  
西家斲古塚來證此老公就死不得控念欲北走邊嚴  
刑重闌出念欲南走越漢地今為一念欲向天上橫天  
置羅網念欲蹈泉下妻子恐偕往薊門使者居中有夜  
行途金銀絡繹去但去莫次且烏畢逋赦書馳歸來相  
賀歸無家安用主上金雞為

大地變

黃河自天浩蕩東奔破涇濁渭以趣龍門仙掌失蹠鏹

其冠蓮二室終南劃吻室咽富媼躩跣疢痛遍體函關  
改途砥柱徙水連城拉然我薨倒懸千井橫流萬竈罷  
烟土欲壓人不避豪族何所非髻誰適為服遺火四焚  
與隣按照人鬼競號莫辨兩曜雍并之黎將靡孑遺粥  
我衣我惟帝是祈帝坐細旃上相相焉曰古堯湯數莫  
敢奸靈著之圓不產惡草豈伊善良而邁凶天嗚呼天  
乎存不恤亡而亡是讐且吾已矣夫

遼陽悼

沮水左三千里室縣磬地如赭東隣初種禾半歲不得  
雨禾苗向下生不復肯出土西隣改種麥一雨六十日  
麥根萎爛盡何處結顆粒邊馬來邊馬來令女力盡負  
弓刀那能顧鋤與犁我欲食榆榆無皮我欲齧堇堇為  
泥爺易兒兒行抱爺啼爺當幸飽死兒死終苦飢曷不  
覩建康城中三萬人白刃手血司農臣司農致白粲少  
府致金錢綾錦出北巷貨貝出南廛索飯得脯索漿得  
酒蒼鷹擊攫靡取不有耿雉襠褌棘螫黃口可憐遼陽

忠義兒白骨相籍朽

直中丞

死事易成事難君不見直中丞披龍鱗食馬肝萬死不  
死脫狴犴胸中無黑白止有徑寸丹中丞未下馬安得  
中丞與白日俱出來照我中丞既按部安得中丞與白  
日俱向暮中丞嚙貴豪不能令貴豪助弱民但縱讒口  
信信中丞寬租稅不益田家饘粥但飽吏胥腹小家裏  
乾餓日日寫訟詞大家不得寢金錢米帛出參差一分

賄吏胥一分與小家一分充餒贖從此轉無涯訟師人  
人富但恨無十腕兩腕指節痛吏胥人人富但恐作富  
人復來小家訟小家人人富作富不得均展轉自為閹  
江南百萬戶戶戶泣且訴生不愛冰與雪但愛得雨露  
中丞自廉亦自直百損不得希一益咄嗟哉齊文宣未  
可忽龍逢比干非俊物

太保歌

北山虎而翼南溟鯨而爪生世不諧錦衣帥作太保太

保入朝門緹騎若雲屯進見中貴人人人若弟昆太保  
從東來一步一風雷行者闌入室居者頷其頰太保賜  
顏色黃金立四壁一言忤太保中堂生荆棘緹騎走八  
方方方俱太保太保百億身所至條如掃雞鳴甲舍開  
爭先衆公卿御史給事中不惜稱門生懽飲丞相邸刻  
臂為父子生非真骨月子貴父不喜但呼太保名能止  
小兒啼鬼伯一何艱荷索便相催縣官為震動急救治  
喪事少府供金錢東園給秘器後帥朱都督特遣護其



家起家像陰山鼎鳳插雲霞帛客雖以繁不及賀者多  
可憐堂中哭不勝巷中歌今皇帝時御史白發陰私稱  
詔籍家財金寶盡流離妻子逐歸故郡兄弟作長流家  
人大小鼠竄不竄作俘囚賜塚踏為田松栢推為薪已  
無牛羊地可上何云近前太保嗔金雞鼓兩翼萬戶初  
帖席土馬行不得萬人各加額有權勿遽歡無權勿終  
酸無權保廬井有權不保七尺棺我歌太保歌貴者蹙  
其顰已令前人後人笑莫令後人笑後人

袁江流鈴山岡當廬江小婦行

湯湯素江流截嶠鈴山岡鈴山自言高素江自言長不  
知何星宿獨火或貪狼降生小家子為災復為祥瘦若  
鸛雀立步則鶴昂藏朱蛇戢其冠光彩爛縱橫孔雀雖  
有毒不能掩文章十五齒邑校二十薦鄉書三十拜太  
史矻矻事編摩五十天官卿藻鏡在留都六十登亞輔  
少保秩三孤七十進師臣獨秉密勿謨八十加殊禮內  
殿敕肩輿任子左司空孽孫執金吾諸兒勝拜跪一一

賜銀緋甲第連青雲冠蓋羅道途倬直不復下中禁起  
周廬涼堂及便房事事皆相宜文絲織隱囊細錦為牀  
帷尚方鑄精鏐胡盃杯芬離雕盤盛玉膳黃票封大糖  
五尺鳳頭尖時時遣問遺黃絨團蟒紗織作自留司匹  
匹壓紗銀百兩頗有餘煎作百和香染為混元衣溫涼  
四時藥手自劑刀圭日月報薄蝕朝賀當暑祁但卧不  
必出稱敕撰直詞御史噤莫聲緹騎勿何誰相公有密  
啓為復未開封九重不斯須婕妤貼當胸密詔下相公

但稱嚴少師或字呼惟中縣官與相公兩心共一心相  
公別有心縣官不得尋相公與司空兩心同一心司空  
別有心相公不得尋昔逐諸城翟黃冠歸田里後詒貴  
溪夏朝衣向東市戈矛生磬咳糞粉成睚眦朝疏論相  
公箠榜夕以至寧忤縣官生不忤相公死相公猶自可  
司空立殺爾凌晨直門開九卿前白事不復問詔書但  
取相公旨相公前報言但當語兒子兒子大智慧能識  
天下體九卿不能答次且出門去不敢歸其曹共過城

西邸司空令傳語偶醉未可起去者歸其曹留者當至  
未九卿面如土九卿足如枳為復且忍饑以次前白事  
司空有德色相公直廬喜司空稍囁嚅相公直廬恚不  
復問相公但取司空旨縣官有密詔急取相公對相公  
不能對急復呼兒子兒子大智慧能識天下體一疏天  
怒迴再疏天顏喜九邊十二鎮諸王三十國中外美達  
官大小員數百各各黃金鑄一一金直南海明月珠  
于闐夜光玉猫精鴉鵲石洒黃祖瑗球紅紫青鞵鞞大

欽定四庫全書

卷二 兗州續編

十四

者如拳葢薔薇古刺水伽南及阿速瑞腦真龍涎十里  
為芬馥古法書名畫何止千百軸玉躡標金題煌煌照  
箱簾妖姬迴鵲隊隊皆殊色銀牀金絲帳玉枕象牙  
席杏衫平頭奴絲膝雙蹴踘酒闌呼不見潛入它房宿  
生理馮子都爛煮秦宮肉生者百叢花歿者一叢棘近  
即龍牀底遠至陰山後凡我民膏脂無非相公有義兒  
數百人監司迨卿寺以至大節鎮侯家并戚里逶迤洙  
泗步燦燦西京手老者相公兒少者司空子謂當操鈞

柄天地俱長久御史上彈章天眼忽一開詔捕少司空  
究覈諸賊罪三木囊赭衣災方禦魑魅金吾一孫戍餘  
者許歸侍意猶念相公績廩存晚計舳艫三十艘滿載  
金珠行相公船頭坐誰敢問譏征嘯傲鄆塢間足誇富  
家翁司空不之戍還復稱司空廣徵諸山村起第象紫  
宮募卒為家衛日夜聲洶洶從奴蹋邑門子弟郡國雄  
不論有反狀訛言所流騰宗社萬不憂黔首或震驚御  
史再發之天威不為恒御史乘飛置捕司空至京司空

欽定四庫全書

卷二 兗州續編

十五

辭相公再拜泣且絮今當長相別兒不負阿父相公心  
自言阿父寧負汝不識一丁字束髮辟三府月請尚書  
奉冠服亞汝父汝父身不保安能相救取重懲監行客  
少入別諸姬歸者吾而配不歸人人妻還撫諸兒郎阿爺  
空何太癡歸者吾而配不歸人人妻還撫諸兒郎阿爺  
生別離金銀空饒積高與鈴山齊不得鑄命身及身兒  
始知兒郎心自言阿爺何太癡有金兒當使無金兒自  
支監行兩指揮各攜鐵銀鐙程程視洩寢步步相扶將

有酒強為歌無酒夜徬徨秋官爰書上頃刻飛騎傳一  
依叛臣法砒死大道邊有屍不得收縱施羣鳥鳶家貲  
巨千萬少府司農錢上寶入尚方中寶發助邊不得稱  
相公沒入優老田片瓦不蓋頭一絲不著肩諸孫呼踐  
更夕受亭長鞭僮奴半充成餘者他州縣夜半一啓門  
諸姬鳥獸竄里中輕薄子媒妁在兩腕相公逼饑寒時  
一仰天歎我死不負國奈何坐兒叛傍人為大笑惜汝  
一何愚汝云不負國國負汝老奴誰令汝生兒誰令汝

縱吏誰納庶僚賄誰朘諸邊儲誰僇直諫臣誰為開佞  
諛誰仆國梁柱誰剪國爪牙土木求神仙誰獨稱先驅  
六十登亞輔少保秩三孤七十進師臣獨秉廊廟謨八  
十加殊禮內殿敕肩輿任子左司空孽孫執金吾諸兒  
勝拜跪一一賜銀緋甲第連青雲冠蓋羅道途以此稱  
無負不如一婁豬食君園中料為君充庖廚以此稱無  
負不如一殺雞食君田中草為君禦霜雪以此稱無負  
不如韝中鵲雖飽則掣去毛羽前嚙決以此稱無負不

如鼠在廁雖有小損傷所共多污穢相公寂無言次且復徬徨頰老不能赤淚老不盈眶生當長掩面何以見穹蒼死當長掩面何以見高皇殮用六尺席殯用七尺棺黃腸安在哉珠襦久還官狐兔未稱尊一丘不得安為子能負父為臣能負君遺臭污金石所得皆浮雲

行臺芝有叙

余嘗讀漢史元封二年有靈芝生於甘泉齋房人主異之下樂官采其事被之樂府所謂齋房



產草九莖連葉宮童効異披圖按課是也甘泉  
往往多淫祀而元封自張湯趙禹後文網蠅密  
酷苛之吏爭獻其技民至重足而立怪哉之告  
則有旃何所感而為芝迺今天子聖哲道化隆  
蔚五時無瀆百神受成而侍御某君奉繡斧出  
按某地四履所臨庶獄庶慎平亭伊始雷雨開  
霽謳謠繼之星月垂燦俄有白芝九莖產於行  
御史院之前榮英英如玉叩之聲若句磬三事

大夫以至裾紳褐博咸嗟美其異形之咏歌流  
於吳苑余不佞攷之瑞命紀云王者仁慈則芝  
生抱朴子曰白雲芝白蓋二重味甘辛小苦服  
之體輕意者某君能布上德意牛斗之分其民  
纖巨無冤氣愁思以來茲應耶夫豈唯君一人  
葆生之餌將國家大慶請綴數言以俟太師之  
采

斗氣何輝輝御史乘驄來雷雨維有解救宥迺得施御

史未受牘蒙氣鬱不開御史受牘竟星月朗不虧

解一

凜

凜栢臺霜百卉皆避之何意三秀草韡韡吐歲蕤亭亭

如車蓋皎皎涅不緇又似三素雲剪為仙人綏

解二

商山

一何卑祇用以療飢句漏何狡獪百種神且奇御史承

德意君王需大慈上等堯除莠下協舜齡期

解三

古樂府六解壽王夫人

夫婿宦東方千騎最上頭夫婿歸去來素封千戶侯

解一

夫婿稱邦君夫人君夫人內政肅不囂外政始如神

解二

夫婿工治經夫人工治生為德於永嘉爭先仁義聲

解三

有子讀父書有婦代姑職有孫復娟娟美於雙白璧

解四

有橘大於斗有桃大於升二八更遞侍鼓簧復吹笙

解五

三十帔已霞五十鬢未秋主誇百年案客誇萬年酬

解六

中丞行當雁門太守

七解

中丞行者吳人為郭公思極作也公善政在三

吳非一而以讒解節當徙鎮吳人挽留之不得

故為樂府歌之

陸行疲車馬水行費舟航壯男罷耕耒小婦拋蠶筐商賈為廢市擔者弛其裝老父攜弱兒踉蹌趨且僵一州

十七邑傾都以彷徨借問何所之云送我郭公

一郭公解

未下車十室九尚空郭公下車後流徙即其宮朝下賑

粟書夕上蠲租章去彼蠹與螟樹我稻與桑一檄飽我

飢再檄起瘵傷三檄潢池內帖帖波不揚

二解

連城千萬

家家家有郭公百吏當讞案案案有郭公原田鋤春雨

公若親勸農橫海出樓舩公若親在行弱者忘其弱強

者諱其強日為郭公日霜者郭公霜

三解

初旭映東嶠郭

公坐堂皇出則剖盈庭入則理堆牀退食無三簋解勞

僅三觴目不覩優施耳不聽清商席客唯邊豆實籩鮮

玄黃不發居間書不畏黃門郎

四解

誰妬我郭公嗟嗟彼

狡童彼狡亦何知疇能掩帝聰臣某誠無狀臣斥分固

當貝錦亦有絲蕙以亦有囊浮塵翳明鏡磨之當益光

重裛襴都梁發之當益芳

五解

德星在女牛一夜徙他方

甘霖正霖霖改潤隔膝袂蹇驢困康莊騏驎眠大荒伯

樂一相顧天路遂騰驤願公健七箸願公壽無疆公以  
衮衣來竹馬滿道傍今日悲相別別後莫相忘

六解

三節婦行凡五解

兩兒奉一父纍纍三少年數促理則綿欣欣在黃泉

一解

兩婦奉一姑皤皤三華顛神往形尚留戚戚總帷前

二解

死者當不生生者須竟死冥冥剖冰心戚戚報君子

三解

天上亦有星地下亦有山山山繫者何萬古同精堅

四解

我歌節婦行采風薦彤史後有曹大家前有劉中壘

五解





弇州續稿卷二